



JABATAN PERKHIDMATAN VETERINAR MALAYSIA

LAPORAN LIPUTAN MEDIA

Isnin, 7 November 2022	
1	Bekalan telur ayam terus berkurangan
2	Kerajaan perketat kawalan eksport ayam ke Singapura
3	Kerajaan keluarga Malaysia tingkat sekuriti makanan

DISEDIAKAN OLEH :
**SEKSYEN KOMUNIKASI KORPORAT,
JABATAN PERKHIDMATAN VETERINAR MALAYSIA**

Bekalan telur ayam terus berkurangan

Pemborong terpaksa hadkan jualan kepada peruncit sejak dua bulan lalu

Oleh Hazira Ahmad Zaidi
bhnews@bh.com.my

Kota Bharu: Peniaga masih lagi berdepan masalah kekurangan bekalan telur ayam, selain bekalan yang diperoleh juga terpaksa dihadkan pemborong sejak dua bulan lalu.

Tinjauan di sekitar pasar dan kedai runcit di Pengkalan Chepa mendapati bekalan telur masih ada, namun bekalan yang diperoleh daripada pemborong terpaksa

sa dihadkan kepada peniaga di kedai runcit mahupun borong.

Peniaga kedai runcit, Mohd Yusof Yahaya, 54, berkata sejak lebih dua bulan lalu dia menerima bekalan telur seperti biasa yang dihantar pemborong di Pasir Pekan setiap dua kali seminggu.

"Bagaimanapun, jumlah telur yang diterima adalah sangat terhad jika hendak dibandingkan dengan sebelum ini, di mana kini saya hanya menerima 20 papan setiap kali penghantaran dan ia tidak mencukupi bagi menampung permintaan pelanggan.

"Kebiasaannya 20 papan telur yang diperoleh daripada pembekal akan habis dijual dalam tempoh dua hari sahaja dan untuk menampung keperluan, pengguna terpaksa menunggu bekalan seterusnya yang dihantar ke kedai.

"Saya terpaksa menunggu

pemborong menghantar bekalan telur ke kedai kerana jika saya sendiri yang pergi membelinya mereka akan memberi alasan telur sudah habis atau bekalan yang diperoleh dikurangkan berbanding mereka sendiri menghantarnya ke kedai," katanya ketika ditemui di Pengkalan Chepa, di sini, semalam.

Harga jualan meningkat

Sementara itu, tinjauan di pasar sama juga mendapati harga ikan meningkat naik antara RM2 hingga RM4 bagi sekilogram ikan berikutan keadaan cuaca yang tidak menentu pada ketika ini.

Peniaga ikan, Rosni Shamsudin, 46, berkata ikan tenggiri yang dijual dengan harga RM36 sekilogram sebelum ini kini dijual RM38 sekilogram dan ikan selar yang dijual RM20 sekilogram sebelum ini kini dijual



Mohd Yusof menyusun telur yang dihantar oleh pembekal di kedainya di Pengkalan Chepa, semalam. (Foto Hazira Ahmad Zaidi/BH)

RM24 sekilogram.

"Peralihan Monsun Timur Laut sedikit-sebanyak menjejaskan pengeluaran bekalan ikan disebabkan nelayan tidak dapat keluar ke laut menangkap ikan.

"Selain itu, harga beberapa jenis ikan juga menunjukkan sedikit kenaikan sejak awal bulan ini berikutan kekurangan bekalan disebabkan keadaan cuaca yang tidak menentu dan bagi

memenuhi permintaan pelanggan saya memperoleh bekalan ikan daripada pemborong di Tok Bali di Pasir Puteh, selain di Kuantan, Kedah dan juga Perak.

"Buat masa ini, keadaan masih lagi terkawal dan bekalan diperoleh seperti biasa, namun saya bimbang apabila memasuki bulan Disember bekalan ikan sukar diperoleh sehingga terpaksa menjual ikan kotak," katanya.

Kerajaan perketat kawalan eksport ayam ke Singapura

Oleh FAHMI FAIZ
utusannews@mediamulia.com.my

PETALING JAYA: Jabatan Perkhidmatan Veterinar (DVS) menetapkan tatacara kebenaran untuk eksport ayam ke luar negara dengan membuat penambahan deskripsi item ayam dieksport bagi membezakan produk ayam pedaging hidup kepada Pedaging Komersial, Pedaging Organik, Ayam Kampung, Ayam Hitam dan Ayam Berwarna.

Dalam satu kenyataan kepada *Utusan Malaysia*, JPV berkata, langkah itu diambil susulan laporan akhbar ini pada 2 November lalu mengenai tiga syarikat Singapura yang menguasai eksport ayam dan ke-

mungkinan syarikat berkenaan menyalahgunakan kebenaran eksport ternakan itu.

Menurut laporan itu yang memetik sumber industri, syarikat terbabit mengeksploitasi kuota eksport ayam hidup dari Malaysia ke negara jiran berkenaan dengan cara melakukan penipuan - ketika mengisytiharkan produk ayam di pintu-pintu keluar negara.

Ayam hidup itu diisytiharkan sebagai ayam kampung atau *color broiler* yang kononnya mematuhi kriteria eksport yang dibenarkan kerajaan Malaysia sedangkan ayam yang dieksport itu merupakan ayam daging warna putih yang mana eksportnya dihadkan kerajaan. Justeru, DVS memaklum-

kan, bagi tujuan eksport ayam, DVS mengeluarkan Sijil Kesihatan Veterinar (SKV) kepada produk-produk yang telah diberi kebenaran untuk dieksport dan dikeluarkan di peringkat negeri.

Katanya, pihak syarikat pengeksport akan menggunakan SKV itu untuk mendapatkan permit eksport daripada pihak Jabatan Perkhidmatan Kuarantin Dan Pemeriksaan Malaysia (Maqis).

"Hanya syarikat yang mempunyai pendaftaran berkaitan produk yang dibenarkan eksport akan mendapat SKV. Maklumat baka atau jenis ayam, jumlah ayam dan nama syarikat akan tertera dalam sijil ini selain daripada pengesahan

kesihatan," kata jabatan itu.

Sebelum ini, semua produk ayam hidup berkongsi kod bidang yang sama dan itu mungkin memberi ruang kepada penyalahgunaan kebenaran eksport.

"Oleh yang demikian, DVS membuat penambahan deskripsi item pada SKV tersebut. Deskripsi ini akan membezakan produk ayam pedaging hidup kepada Pedaging Komersial, Pedaging Organik, Ayam Kampung, Ayam Hitam dan Ayam Berwarna.

"Penjelasan deskripsi ini akan membantu pihak Maqis semasa menjalankan pemeriksaan dokumen dan fizikal di pintu-pintu keluar negara," katanya.

Kerajaan Keluarga Malaysia tingkat sekuriti makanan



Varia
Oleh
**MUHAMMAD
ZHARIF LUQMAN
HASHIM**

SEJAK Januari 2022, peningkatan harga yang diukur berdasarkan pertumbuhan Indeks Harga Pengguna (CPI) bagi makanan dan minuman mengatasi harga keseluruhan barangan dalam ekonomi.

Data menunjukkan peningkatan harga makanan dan minuman pada Jun 2022 adalah yang tertinggi sejak 2015. Peningkatan harga itu memberi kesan besar kepada isi rumah kerana mereka memperuntukkan sekitar 29.5 peratus daripada perbelanjaan mereka ke atas makanan dan minuman.

Isu peningkatan harga makanan yang melanda Malaysia pada ketika ini adalah isu global. Sebagai sebuah negara kecil yang terbuka dan berdagang, Malaysia tidak boleh mengelak daripada menerima kesan ke atas gelagat negara-negara yang menjadi pembekal utama bahan mentah sektor pertanian dan industri makanan.

Malaysia bergantung kepada import makanan dan bahan mentah seperti makanan ayam daripada negara luar. Negara-negara pengeksport ini telah mengalami gangguan pengeluaran akibat pandemik Covid-19, ketidakpastian cuaca dan keadaan geopolitik.

India umpamanya telah mengehadkan eksport gandum kerana faktor cuaca yang mengehadkan pengeluaran. Peperangan Rusia-Ukraine juga memberi kesan langsung kepada negara-negara yang berdagang dengan Malaysia seperti Eropah.

Dengan keadaan tersebut, Malaysia juga akan terkesan secara tidak langsung.

Apakah kesan inflasi ini kepada rakyat? Selain daripada kuasa membeli rakyat semakin berkurangan akibat kenaikan tingkat pendapatan lebih rendah berbanding kenaikan harga barangan, tekanan kepada sekuriti makanan turut menjadi perkara yang perlu diberi perhatian.

Mengapa sekuriti makanan penting kepada rakyat? Sekuriti makanan bermaksud makanan yang dibekalkan dalam pasaran domestik mencukupi untuk keperluan rakyat, mudah diperolehi dan bekalan berterusan serta stabil.

Kerajaan di bawah pimpinan Perdana Menteri, Datuk Seri Ismail Sabri Yaakob telah menjalankan pelbagai strategi mengurangkan tekanan kos hidup dan memastikan sekuriti makanan menjadi agenda utama menjaga kebajikan rakyat.

Secara spesifiknya, kerajaan telah merangka strategi jangka masa pendek,



KERAJAAN telah melaksanakan pelbagai strategi bagi mengurangkan kos sara hidup masyarakat ekoran peningkatan harga barangan makanan. — GAMBAR HIASAN

Sekuriti makanan bermaksud makanan yang dibekalkan dalam pasaran domestik mencukupi untuk keperluan rakyat, mudah diperolehi serta bekalan berterusan dan stabil.

antaranya menyediakan pemberian subsidi langsung kepada pengeluar bagi menstabilkan harga makanan di pasaran serta mengimbangi kos pengeluaran makanan.

Sebagai contoh, harga ayam runcit di pasaran adalah pada RM9.40 sekilogram, manakala harga minyak masak (botol) runcit pula pada RM7.10 sekilogram.

Kerajaan juga masih memberi subsidi bahan api bagi mengawal inflasi makanan dan barangan lain dalam ekonomi. Perkara ini susulan daripada timbulnya trend peningkatan harga minyak mentah yang meningkat daripada AS\$84.1 setong pada Januari 2022 hingga mencecah AS\$114.7 setong pada Jun 2022.

Perkara ini turut menyumbang kepada perbelanjaan subsidi terbesar dalam sejarah iaitu jangkaan subsidi hampir sebanyak RM80 bilion bagi tahun 2022.

Jika subsidi bahan api dikurangkan, ia akan meningkatkan harga bahan api, sekali gus memberi impak berganda kepada inflasi makanan dan keseluruhan barangan.

Malaysia juga dilihat bakal bekerjasama dengan kerajaan Turkiye dalam

memperkasakan sekuriti makanan.

Perjumpaan Perdana Menteri bersama Presiden Turkiye, Recep Tayyip Erdogan telah mencapai kata sepakat bagi memastikan rantaian bekalan makanan sentiasa mencukupi dan stabil.

Ini membuktikan komitmen dan usaha proaktif kerajaan dalam menstabilkan bekalan makanan di Malaysia dengan adanya Perjanjian Perdagangan Bebas Malaysia-Turkiye.

Malaysia juga akan bekerjasama dengan Turkiye untuk memperkukuhkan beberapa aspek sokongan dalam sektor makanan.

Setelah sekian lama diperjuangkan pakar, akhirnya strategi mengubah struktur pengeluaran sektor pertanian dan makanan telah diambil kira oleh kerajaan.

Strategi ini bersifat jangka panjang kerana ia memakan masa lebih lama untuk melihat keberkesanannya.

Merujuk kepada dokumen Rancangan Malaysia Ke-12, kerajaan telah mengusulkan Pelan Tindakan Dasar Sekuriti Makanan Negara (DSMN) 2021-2025. Pelan tersebut telah berjaya direalisasikan oleh Kementerian Pertanian dan Industri Makanan dengan menjumpukan lima teras, 15 strategi dan 96 inisiatif dalam memastikan kesiapsiagaan negara dalam menghadapi krisis sekuriti makanan dan situasi luar jangka.

Kerajaan juga telah menghapuskan sistem permit import (AP) yang akan memberi peluang lebih ramai pembekal untuk mengimport makanan dan bahan mentah. Ini akan menjadikan sektor pertanian lebih kompetitif dan berdaya saing, seterusnya akan menstabilkan

harga pada masa depan.

Satu inovasi baharu tadbir urus juga telah dilaksanakan oleh pihak kerajaan bagi memastikan isu sekuriti makanan turut diteliti secara proaktif yang didasari pelbagai peringkat pentadbiran.

Penubuhan Jawatankuasa Sekuriti Makanan Peringkat Negeri dan Daerah telah dipersetujui bagi memastikan Pelan Tindakan DSMN 2021-2025 dapat dilaksanakan sebaiknya.

Sekuriti makanan juga memerlukan pelaburan berskala besar supaya kapasiti pengeluaran makanan negara dapat ditingkatkan.

Kerajaan Malaysia telah membuat satu rundingan bersama kerajaan Emiriah Arab Bersatu (UAE) untuk menawarkan pelaburan berbalik dalam sektor pertanian, sekali gus membantu UAE menjadi hab makanan di Asia Barat.

Malah, pengeluar ternusu Qatar menerusi Syarikat Baladna telah membuat pelaburan sejumlah RM4.5 bilion dalam sektor penternakan yang bakal menjadikan Malaysia pengeluar ternusu terbesar di Asia Tenggara.

Hal ini membuktikan bahawa kerajaan Malaysia sedang bergerak secara proaktif bagi memastikan sekuriti makanan negara berada pada tahap terbaik.

Strategi dilaksanakan bukan sahaja melangkaui perancangan, tetapi dibuktikan dalam bentuk tindakan yang boleh memberikan manfaat kepada Keluarga Malaysia.

MUHAMMAD ZHARIF LUQMAN HASHIM
ialah Ahli Ekonomi Pusat Kajian Pasaran
Buruh Masa Hadapan (EU-ERA)